

比丘尼傳

比丘尼傳卷第一

晉莊嚴寺釋寶唱撰

序

原夫貞心亢志。奇操異節。豈唯體率由於天真。抑亦勵景行於仰止。故曰希顏之士。亦顏之儔。慕驥之馬。亦驥之乘。斯則風列英徽。流芳不絕者也。是以握筆懷鉛之客。將以語厥方來。比事記言之士。庶其勸誡於後世。故雖欲忘言。斯不可已也。昔大覺應乎羅衛。佛日顯於閻浮。三界歸依。四生向慕。比丘尼之興發。源於愛道。登地證果。仍世不絕。列之法藏。如日經天。

自拘尸滅影。雙樹匿跡。歲歷蟬聯。陵夷訛紊。於是時  
澆信謗。人或存亡。微言興而復廢者。不肖亂之也。正  
法替而復隆者。賢達維之也。像法東流。淨檢爲首。縣  
載數百。碩德係興。善妙淨瑤。窮苦行之節。法辯僧果。  
盡禪觀之妙。至若僧端僧基之立志貞固。妙相法令  
之弘震曠遠。若此之流。往往間出。並淵深岳峙。金聲  
玉震。實惟菽葉之貞幹。季緒之四依也。夫年代推移。  
清規稍遠。英風將範於千載。志事未集乎方冊。每懷  
慨歎。其歲久矣。始乃博採碑頌。廣搜記集。或訊之傳  
聞。或訪之故老。詮序始終。爲之立傳。起晉咸和。訖梁

普通凡六十五人不尚繁華務存要實庶乎求解脫者勉思齊之德而寡見庸疏或有遺漏博雅君子箴其闕焉。

洛陽竹林寺竺淨檢尼一

趙建賢寺安令首尼二

司州西寺智賢尼三

弘農北岳寺妙相尼四

建福寺康明感尼五

北永安寺曇備尼六

建福寺慧湛尼七

延興寺僧基尼八

洛陽城東寺道馨尼九

洛陽城新林寺道容尼十

司州寺令宗尼十一

簡靜寺支妙音尼十二

何后寺道儀尼十三

洛陽竹林寺竺淨檢尼一

淨檢。本姓种。名令儀。彭城人。父誕。武威太守。檢少好學。早寡。家貧。常爲貴遊子女教授琴書。聞法信樂。莫由諮稟。後沙門法始。經道通達。晉建興中。於宮城西

門立寺。檢乃造之。始爲說法。檢因大悟。念及強壯以  
求法利。從始借經。遂達旨趣。他日謂始曰。經中云。比  
丘比丘尼。願見濟渡。始曰。西域有男女二眾。此土其  
法未具。檢曰。旣云比丘比丘尼。寧有異法。始曰。外國  
人云。尼有五百戒。便應是異。當爲問和上。和上云。尼  
戒大同。細異。不得其法。必不得授。尼有十戒。得從大  
僧受。但無和上。尼無所依止耳。檢卽剃落。從和上受  
十戒。同其志者二十四人。於宮城西門。共立竹林寺。  
未有尼師。共諮淨檢。過於成德。和上者。西域沙門智  
山也。住罽賓國。寬和有智思。雅習禪誦。晉永嘉末。來

達中夏。分衛自資。語必弘道。時信淺薄。莫知祈稟。建武元年。西返罽賓。後竺佛圖澄還。述其德業。皆追恨焉。檢蓄徒養眾。清雅有節。說法教化。如風靡草。晉咸康中。沙門僧建。於月支國得僧祇尼羯磨及戒本。興平元年二月八日。於洛陽譯出。外國沙門曇摩羯多。爲立戒壇。晉沙門釋道場。以戒因緣。經爲難。云其法不成。因浮舟於泗。檢等四人同壇止。從大僧以受具戒。晉土比丘尼。亦檢爲始也。當其羯磨之日。殊香芬馥。闔眾同聞。莫不欣歎。加其敬仰。善修戒行。志學不休。信施雖多。隨得隨散。常自後己。每先於人。到咸康

末忽復聞前香。并見赤氣。有一女人。手把五色花。自空而下。檢見欣然。因語眾曰。好持後事。我今行矣。執手辭別。騰空而上。所行之路。有似虹霓。直屬於天。時年七十矣。

僞趙建賢寺安令首尼二

安令首。本姓徐。東莞人。父忬。仕僞趙外兵部令。首幼聰敏好學。言論清綺。雅性虛淡。不樂人間。從容閑靜。以佛法自娛。不願求媵。父曰。汝應外屬。何得如此。首曰。端心業道。絕想人外。毀譽不動。廉正自足。何必三從。然後爲禮。父曰。汝欲獨善一身。何能兼濟父母。首



曰。立身行道。方欲度脫一切。何況二親耶。忭以問佛。圖澄澄曰。君歸家潔齋三日。竟可來。忭從之。澄以臙脂磨麻油。傅忭右掌。令忭視之。見一沙門在大眾中。說法。形狀似女。具以白澄。澄曰。是君女先身出家。益物。往事如此。若從其志。方當榮拔六親。令君富貴。生死大苦。向得其邊。忭還許之。首便翦落。從澄及淨檢尼受戒。立建賢寺。澄以石勒所遺翦花納七條衣及象鼻澡罐與之。博覽羣籍。經目必誦。思致淵深。神照詳遠。一時道眾。莫不宗焉。因其出家者二百餘人。又造五寺。立精舍。匪憚勤苦。皆得修立。石虎敬之。擢忭

爲黃門侍郎清河太守。

司州西寺智賢尼三

智賢本姓趙常山人也。父珍扶柳縣令。賢幼有雅操。志槩貞立。及在緇衣。戒行修備。神情凝遠。曠然不雜。太守杜霸篤信黃老。憎疾釋種。符下諸寺。剋日簡汰。制格高峻。非凡所行。年少怖懼。皆望風奔駭。唯賢獨無懼。從容興居自若。集城外射堂。皆是耆德。簡試之日。尼眾盛壯。唯賢而已。霸先試賢以格格。皆有餘。賢儀觀清雅。辭吐辯麗。霸密挾邪心。逼賢獨住。賢識其意。誓不毀戒法。不苟存身命。抗言拒之。霸怒以刀斫。

賢二十餘瘡。悶絕躡地。霸去乃甦。倍加精進。菜齋苦節。門徒百餘人。常如水乳。及苻堅僞立。聞風敬重。爲製織繡袈裟。三歲方成。價直千萬。後住司州西寺。弘顯正法。開長信行。晉太和中。年七十餘。誦正法華經。猶日夜一徧。其所住處。衆鳥依栖。經行之時。嗚呼隨逐云云。

弘農北岳寺妙相尼四

妙相。本姓張。名珮華。弘農人也。父茂家素富盛。相早習經訓。十五適太子舍人北地皇甫達。達居喪失禮。相惡之。告求離絕。因請出家。父並從之。精勤蔬食。遊

心慧藏。明達法相。住弘農北岳。蔭林西野。徒屬甚多。悅志閑曠。遁景其中。二十餘載。厲精苦行。久而彌篤。每說法度人。常懼聽者不能專志。或涕泣以示之。是故其所啟訓。皆能弘益。晉永和中。弘農太守請七日齋。座上白衣。諮請佛法。言挾不遜。相正色曰。君非直見慢。亦大輕邦宰。何用無禮。苟出人間耶。於是稱疾而退。當時道俗感歎服焉。後枕疾累日。臨終恬悅。顧語弟子曰。不問窮達。生必有死。今日別矣。言絕而終。

建福寺康明感尼五

明感。本姓朱。高平人也。世奉大法。經爲虜賊所獲。欲

以爲妻。備加苦楚。誓不受辱。謫使牧羊。經歷十載。懷歸轉篤。反途莫由。常念三寶。兼願出家。忽遇一比丘。就請五戒。仍以觀世音經授之。因得習誦。晝夜不休。願得還家。起五層塔。不勝憂念。逃走東行。初不識路。晝夜兼涉。逕入一山。見有斑虎。去之數步。初甚恐懼。少卻意定。心願逾至。遂隨虎而行。積日彌旬。得達青州。將入村落。虎便不見。至州復爲明伯連所虜。音問至家。夫兒迎贖。家人拘制。其志未諧。苦身勤精。三年乃遂。專篤禪行。戒品無愆。脫有小犯。輒累晨懺。悔要見瑞相。然後乃休。或見雨花。或聞空聲。或覩佛像。或

夜善夢。年及桑榆。操業彌峻。江北子女。師奉如歸。晉太和四年春。與惠湛等十人濟江。詣司空公何充。充一見敬重。於時京師未有尼寺。充以別宅爲之立寺。問感曰。當何名之。答曰。大晉四部。今日始備。檀越所建。皆造福業。可名曰建福寺。公從之矣。後遇疾。少時便卒。

北永安寺曇備尼六

曇備。本姓陶。丹陽建康人也。少有清信。願修正法。而無有昆弟。獨與母居。事母恭孝。宗黨稱之。年及笄。嫁微幣弗許。母不能違。聽其離俗。精勤戒行。日夜無怠。

晉穆皇帝禮接敬厚。嘗稱曰久看更佳。謂章皇后何氏曰。京邑比丘尼。鮮有曇備儔也。到永和十年。后立寺於定陰里。名曰永安。今爲何后寺也謙虛導物。未嘗有矜慢之容。名譽日廣。遠人投集。眾三百人。年七十二。泰元二十一年卒。弟子曇羅。博覽經數。機才贍密。勅續師任。更立四層塔。講堂房宇。又造臥像。及七佛龕堂云云。

建福寺惠湛尼七

惠湛。本姓任。彭城人也。神貌超遠。精操殊特。淵情曠遠。濟物爲務。惡衣蔬食。樂在其中。嘗荷衣山行。逢羣

劫欲舉刃向湛。手不能勝。因求湛所負衣。湛歡笑而與曰。君意望甚重。所獲殊輕。復解其衣裏新裙與之。劫卽辭謝。併以還湛。湛捨之而去。建元二年渡江。司空何充大加崇敬。請居建福寺住云云。

### 延興寺僧基尼八

僧基。本姓明。濟南人也。縮髮志道。秉願出家。母氏不聽。密以許娉。祕其聘禮。迎接日近。女乃覺知。卽便絕糧。水漿不下。親屬禁請。意不可移。至於七日。母呼女婿。婿敬信。見婦殆盡。謂婦母曰。人各有志。不可奪也。母卽從之。因遂出家。時年二十一。內外親戚。皆來慶



慰競施珍席。爭設名供。州牧給伎。郡守親臨。道俗咨嗟。歎未曾有。基淨持戒範。精習經數。與曇備尼名輩。略齊機樞最密。善事議乘。皇帝雅相崇禮。建元三年。皇后褚氏爲立寺於都亭。旦運巷內。名曰延興。基尼寺住。徒眾百餘人。當事清明。道俗加敬。年六十八。隆安元年卒。

洛陽城東寺道馨尼九

竺道馨。本姓楊。太山人也。志性專謹。與物無忤。沙彌時。常爲眾使。口恆誦經。及年二十。誦法華維摩。具足戒行。後研求理味。蔬食苦節。彌老彌勵。住洛陽東寺。